

續名醫類案

第三十三

S28

1817

1733



續名醫類案卷三十三

錢塘魏之琇編集

濮院呂大綱慎齋
海昌王士雄孟英

同校

腸癰

華陀傳軍吏李成苦咳嗽晝夜不寤時吐膿血以問陀陀言
君病腸癰咳之所吐非從肺來也與君散兩錢當吐二升餘
膿血吐訖自養一月可小起好自將愛一年便健十八歲
當一小發服此散亦行復差若不得此藥故當死復與兩
錢散成得藥去五六歲親中人有疾如成者謂成曰卿今

强健我欲死何忍無急弄藥

松之庄古語以藏爲弄

以待不詳先持

貸我我差爲卿從華陀更索成與之已故致譙適陀見收

忽忽不忍從求後閱十八年成病竟發無藥可服以至于

死

三國志

薛立齋治金臺院僉憲年逾五十腹內隱痛小便如淋皮膚錯縱而脉滑數此腸癰也脉滑數則膿已成遂以廣東牛皮膠溶化送太乙膏下膿升許更以排膿托裏藥及蠟蟾丸而愈

孫文垣治染匠婦腹痛兩年或以爲寒爲熱爲氣爲血爲蟲爲積治不效或與膏藥大如斗貼之痛益劇欲去揭之牢

粘不可揭卧舟中數人扶之不起往診見其面色蒼黑兩

手枯燥如柴六脉皆洪數腹痛脉洪數內癰可問其痛之

所在解衣指示痛有定處始知膏藥牢粘叩其不能起步之由

乃左脚不可動動則痛應于心察其色脉皆非死候此必

腸癰左脚不能舉動是其徵也俗名縮脚腸癰與營衛反魂湯加

金銀花爲君四帖酒水各半煎服一帖痛稍減二貼下臭

膿半桶病全減膏藥亦不揭自落四貼完其婦與匠來謝

并求善後之方

龔子才治一婦人腹痛如錐每痛欲死不可著手六脉洪數

此腸癰也用穿山甲炒白芷貝母殭蠶大黃合一大劑水

煎服膿血從小便處出而愈

李士材治吳光祿夫人患腹滿而痛喘急異常飲食不進或用理氣利水之劑二十日不效診之脉大而數右尺爲甚。人按腹手不可近曰此大腸癰也脈數爲膿已成用黃芪爲刺白芷之類加葵根一兩煎一碗頓服之未申痛甚至夜半膿血大下昏暈不支卽與獨參湯稍安更與十全大補兩月而愈。

周漢卿治義烏陳氏子腹有塊捫之如罌漢卿曰此腸癰也。用大針灼而刺之入三寸許膿隨針迸出有聲愈。

明史

薛立齋診秀水卜封君善飲腹痛便瀉服分利化痰等劑不

應其脉滑數。膚皮甲錯。謂此酒毒。致腸癰而潰敗也。辭不治。仍服煎劑。果便膿而歿。

孫某治一女子。腹痛百方不效。脈滑數。時作熱。腹微急。孫曰。痛病脉當沉細。今滑數。腸癰也。以雲母膏一兩。爲丸如梧子大。以牛皮膠溶入酒中。并水吞之。餉時服盡。下膿血愈。

外科
心法

薛立齋治通府張廷用。患腸癰。兩月餘矣。時出白膿。體倦惡寒。此邪氣去而中氣虛也。用托裏散兼益氣湯。徐徐呷之。又令以猪肚肺煮爛。取其湯調米粉煮。時呷半盞。後漸調理而痊。

一男子小腹痛而堅硬小便數汗時出脉遲緊以大黃湯一

劑下瘀合許以薏苡仁湯四劑而安。苡仁瓜蒌各三錢丹皮桃仁各二錢

一男子患腸癰膿已成用雲母膏一服下膿升許更以排膿

托裏藥而愈後因不守禁忌以致不救。

一人患腸癰偃僕痛不能伸有道人教以飲純黃犬血二碗

和白酒服其人遂飲至四碗次日下膿血盡而瘳。廣筆記

腸風臟毒

孫文垣治潘大司馬常有腸風之症八月丁祭學博餽鹿血

食之血暴下用槐角子五錢黃連枳壳地榆貫衆各三錢。

一服而止。潘善其方。書之粘壁間。遇有便血者。依方服之。無不立效。

陳鹿塘原有腸風臟毒之症。大便秘結。數日不能一行。痛苦殊甚。此胃寒腸熱也。其脈兩寸皆數。兩關弦而無力。兩尺洪滑。而左尤甚。久治不效。因憶東垣有云。大腸喜清而惡熱。脾胃喜溫而惡寒。以胃屬土。腸屬金也。乃制一方。專以揚風臟毒藥爲主。外以養血之藥裹之。使不傷胃氣。蓋藥先入胃。後入大腸。入胃時裏藥未化。及入大腸。則裏藥化而君藥始見。庶幾兩不相妨。因以九製大黃二兩。槐花三兩。木耳二兩。郁李仁皂角子象牙屑條芩各一兩。血餘升

麻荊芥穗各五錢。共爲末。煉蜜爲丸。赤豆大。外以四物加
蒲黃各一兩爲衣。米飲送下。空心及下午各二錢。血果止。
大便不燥。飲食日加而愈。

王祖泉大便裏急後重。腹痛。日夜下紫稠粘三四十度作痢。
治三月不效。肌瘦。嬾食。眼合。嬾開。悉以爲不治。脉之六部
濡弱。所下之色甚晦。狀如芋苗汁。曰此非痢。乃臟毒下血
也。醫說中人參。樗皮散正與此對。卽製與之。其夜果減半。
終劑全愈。方以人參。樗根。白皮各二兩爲末。空心米飲調
二錢。忌肉汁。生菜。魚腥。

湯封君簡庵血分熱甚。以善飲致腸風。且心腎不交。以四物

湯加棗仁側柏葉槐花連翹蜜爲丸服之卽愈。

吳孚先治張東銘素患痔疾兼後重之症似痢非痢登園窘迫行步如跨馬狀坐亦作楚六脈偏盛稍覺無神知爲氣血虛而挾濕熱用芎歸苓連生地槐角查肉升麻加人參二兩爲丸彼去參服之不效復入參服半料已全愈。

張子和曰一男子臟毒下血當六月熱不可堪自分必死忽思蜜水猛舍性命飲一大盞痛止血住。

汝南節度副使完顏君寶病臟毒下血發渴寒熱往來延及六載日漸瘦弱無力面黃如染張診其兩手脉沉而身涼內經寒以爲營氣在故生可治先以七宣丸下五七行。

次以黃連解毒湯加當歸赤芍地榆散同煎服之。一月而愈。

方勺泊宅編云外兄劉掾病臟毒下血凡半月自分必死得一方只以乾柿燒灰飯服二錢遂愈。又王璆百一方云曾通判子病下血十年亦用此方一服而愈爲丸爲散皆可。

本草
綱目

薛立齋治一男子臟毒下血服涼血敗毒藥不惟血不能止且飲食少思肢體愈倦脉數按之則澹先以補中益氣湯數劑少止更以六君子湯加升麻四劑而止乃去炮薑加芎歸月餘脾胃亦愈常治積熱或風熱下血者先以

敗毒散散之胃寒氣弱者用四君子湯或參苓白朮散補之并効

一男子臟毒下血脾氣素弱用六君子湯加芎歸枳壳地榆槐花治之而愈後因謀事血復下諸藥不應意思慮傷脾所致投歸脾湯四劑而痊大抵此症所致之由不一當究其因而治之丹溪云芎歸湯一劑又調血之上品熱加茯苓槐花冷加茯苓木香此則自根自本之論也雖然精氣血出于穀氣惟大腸下血以胃藥收功以四君子湯參芪白朮散以枳壳散小烏沉湯和之胃氣一回血自循經絡矣腸風者邪氣外入隨感隨見臟毒者蘊積毒久而始見

又云人惟坐卧風温醉飽房勞。生冷停寒酒麪積熱。以致
榮血失道。滲入大腸。此腸風臟毒之所作也。挾熱下血。清
而色鮮。腹中有痛。挾冷下血。濁而色黯。腹內畧痛。清則爲
腸風。濁則爲臟毒。有先便而後血者。其來也遠。有先血而
後便者。其來也近。世俗尿前尿後之說非也。治法大要先
當解散腸胃風邪。熱則敗毒散。冷則換金正氣散。加芎歸。
後隨其冷熱治之。劉河間云。起居不節。用力過度。則絡脉
傷。陽絡傷則血外溢。血外溢則衄血。陰絡傷則血內溢。血
內溢則便血。腸胃之絡傷則溢血。腸外有寒汁沫。與血相
搏。則併合凝聚不得散。而成積矣。又內經云。腸癖下膿血。

脉弦絕者死。滑大者生。血溢身熱者死。身涼者生。諸方皆謂風熱侵于大腸而然。若飲食有節。起居有時。腸胃不虛。邪氣從何而入。

王執中云。何教授湯籛有腸風疾。積年不愈。取脊端窮骨名龜尾。當中一灸。除根。湯籛因傳此方。後觀灸經。此穴療小兒脫肛瀉血。蓋岐伯灸小兒法也。後人因之以灸大人腸風瀉血耳。蓋大人小兒之病。初不異故也。五痔便血失尿。廻氣灸百壯。在脊窮骨上赤下白處。

痔

附脫肛

孫文垣治周文川。肛上生一腫毒。月餘膿潰矣。但少動則出鮮血不止。大便結燥。胸膈飽悶。飲食不思。脈之兩寸短弱。關弦尺洪滑。此氣虛血熱。陷于下部。宜補而升提。不然痔瘡將作。可慮也。黃芪二錢。歸身地榆槐花枳殼各一錢。升麻秦艽各七分。荊芥穗五分。甘草三分。服後胸膈寬。惟口苦甚。前方加酒連連翹各五分而愈。

高仰山內人痔血裏急。後重飲食入腹。大便卽行。晝夜五六度。五更咳嗽痰。肌肉脫口作渴。由服涼血之劑過多。致脾氣虛不能統血也。脈之六部皆軟弱無力。以大君子湯加荊芥穗秦艽陳皮炮薑四帖而飲食進。血全止。嗽亦定。

減炮薑倍加何首烏又四帖遂數年不發。

徐檢老發寒熱臀近肛硬處生一毒紅腫而痛坐卧爲難外科以鑷針點開插藥綫于內塗以爛藥使膿血急潰又與敷生肌藥使易收口受謝而去未半月硬處之旁又紅腫痛寒熱交作召前醫治法如前受謝以去遞醫遞患幾半年矣診之面色青慘脈皆濡弱手足如冰飲食減半究所服則槐角生地黃柏之屬曰此痔癰非痔漏也痔漏當用挂綫以五灰膏點之可愈今腫硬無定處離肛門且遠其初只可大補氣血卽有毒亦宜託出一膿而愈此王道之治不勝于針刀萬萬哉乃內用寒涼外用收口動輒挂綫。

致凝滯流注。愈而屢發。非稟厚氣強。六旬餘人。安能當此。與十全大補四帖。飲食加。手足煖。大便艱澀。向潤之而不行者。今亦通利。再以首烏四兩。人參枸杞當歸黃芪熟地各二兩。槐角秦艽各一兩。蜜丸服之。腫處出少膿全瘳。徐喜而謔曰。予非孫君。諸外科視此臀爲金穴矣。呵呵。

醫學博士齊德之云。予讀養生必效方。見乾義傳僧覺海少年患痔疾。其行業比冰霜。此緣飽食久坐。知痔疾者。不必酒色過度矣。故素問云。因而飽食。筋脉橫解。腸癖爲痔。治之故不同也。三神丸。枳壳皂角五倍。蜜丸。每服二三十丸。